



ル 5
3650
1



3620
1

今更地家言與今球形勢以五印度為道中自當又物
審制之邦佛所由處也然其間絕遠是統載關然為
以東總譯經典其詳充錄至最附屬連山較詳印
朝何源流報多陸略可攷與獨唐使王元景再至天
竺以兵力廣其國主婆羅門唐釋元奘游五天竺
大唐西域記十二卷新書據以立傳五印度唐以前
字為然然新開然稱之今歸示知然物合否然亦
不尤極極率極極極極極極極極極極極極極極極
信十示示且且且且且且且且且且且且且且且且

門 5
號 3650



敘

今輿地家言東半球形勢以五印度為適中自昔文物
聲明之邦佛所出處也然其闊絕諸夏紀載闕然齊梁
以來繙譯經典其書充棟至於阿耨達山枝幹印度新
陶河源流粗涉厓略難可攷索獨唐使王元策再至天
竺以兵力虜其國主婆羅門唐釋元奘游五天竺歸著
大唐西域記十二卷新書據以立傳五印度唐以前疆
宇乃粲然著明然稽之今圖未知果吻合否年家子華
亭沈師徐孝廉癖嗜邊陲輿地之學以所著唐書西域
傳注示余且曰今西藏迤西南不外攘則內侵以五印

陸侯氏曰藏書

文

度爲關鞬俄人盡併浩罕諸回部偏近克什米爾不東略則南牧亦以五印度爲關鞬英人遠撫長駕屬地徧五大洲然其國勢偏於印度道光中廓爾喀曾請兵往攻以綴廣東之師事雖不行其形勝扼塞籌邊者所當察也西人精於測量圖繪印度圖已譯者猶尠然以徐松龕魏嘿深之書與近人所紀述診之唐史其道里遠近山川脈絡若合符節以服元奘紀載之精唐書采之爲有識也余觀其注蓋大率博攷古書證以今地兼及近事義類宏富非規規攷證名物者沈子取徐星伯注漢書西域傳意自號師徐余嘉其志之勤且博也憇愚

盡付之梓而爲之弁言以爲嚆矢光緒二十四年孟夏年世愚弟長白世杰拜序



唐書西域傳注

華亭沈惟賢師徐述



泥婆羅

元奘西域記作尼波羅今西藏西南廓爾喀地本名
 泥泊爾一作尼博拉瀛環志畧又稱尼巴爾地理備考又稱尼
 報里外國史畧一名尼保爾每月統紀傳又作泥泡耳印度記明
 史謂之西天尼八刺國皆泥婆羅一音之轉舊分布
 顏葉楞庫庫木三罕 國朝雍正十一年各以金葉
 表文貢方物嗣為屬部廓爾喀所併始以今名通焉
 乾隆五十三年兼有哲孟雄作木朗洛敏湯諸部遂

興兵闖邊唐古忒兵不能禦而 朝廷所遣御前
侍衛巴忠等陰令唐古忒歲許幣萬五千金風廓爾
喀使進納表貢乃以賊窘蹙乞降聞五十六年廓爾
喀復誘執西藏噶布倫丹津班珠爾自薩迦溝入掠札
什倫布而去餘賊屯濟隆絨轄聶拉木五十七年

命嘉勇公福康安爲將軍超勇公海蘭察爲參贊
大臣率索倫達呼爾兵由青海至藏累敗其屯界之
賊盡復藏地遂大舉深入攻克熱索橋及碉卡數十
涉虜境七百餘里偪其都城方是時其國境南鄰印
度爲英吉利屬部與廓夷積釁聞北垂被兵則亦興

師擾其南鄙廓人洵懼再遣使歸丹津巴珠爾等獻
札什倫布所掠進馴象蕃馬及樂工一部奉表歸誠
詔許內附五年一貢由四川北上衛藏通志曰乾隆
五十九年駐藏大臣新定界址自宗喀通濟嚨至熱
索橋設立鄂博此內爲西藏境此外爲廓爾喀境又
自定日通聶拉木至鐵鎖橋設立鄂博此內爲西藏
境此外爲廓爾喀境

直土蕃之西樂陵川

今西藏唐土蕃也魏源聖武記曰自四川打箭爐西
行二十餘驛至前藏四十二驛至中藏又十二驛至

後藏又十二驛至濟隴又三十驛至石宿堡爲後藏
極邊地踰橋而西則廓爾喀矣黃沛翹曰自阿里起
沿廓境東南行其要隘曰薩喀曰達卽拉山曰宗喀
曰嗎爾曰滾達曰卓黨曰濟隴曰俄隴曰索絨曰札
木多曰聶拉木曰熱索橋橋臨鈕楚河水發源滾達
卓黨山南經濟俄索聶等處出橋下入廓境按鈕楚
河水道提網作牛楚河自年爾木城卽聶拉木東南流出
藏南境過朱拉拉依部落此當指巴勒布舊地爲廓夷所併者入厄訥
特克國界卽印度國下流入雅魯藏布江此水源流千里
疑卽唐書之樂陵川矣

土多赤銅犛牛

外國史畧尼報里國產鐵鉛銅等山海經潘候之山
有獸狀如牛而四節生毛名曰犛牛郭注背郟皆有
長毛慧琳一切經音義雙膝上臆前及尾或白或黑
俗翦髮逮眉穿耳揜以簞若角緩至肩者爲姣好舊書以竹簞牛角

盛繩祖衛藏圖識巴勒布黃楸材印度劄記廓爾喀都城曰加得曼都一名陽布又名巴勒布卽古之白布國也番民皆薙髮蓄小辮聯鬚短鬚似
西甯回鶻尙容飾額上塗白土二豎眉間塗紅土一
丸用金珠鑲花綴兩耳徐繼畲瀛環志畧廓爾喀亦

雕題種類彩衣塗額與印度諸部同

無匕筋攫而食其器皆用銅其居版屋畫壁

通典殷周之時中華人尚以手團食故禮記云共飯不澤手蓋弊俗漸改仍未盡耳按衛藏圖識番民男女老少多手掬而飲食之平房稍大者其堂必刻桷雕楹備極煊爛知土風尚猶昔也至於飲食之器藏中率用木椀而西域圖志載回部所製烈干塔赫錫鄂喇札木密斯噶藏之屬皆紅銅爲之以盛牛馬肉汁及飲食果品斯其教俗所漸物土之宜矣其俗不知牛耕故少田作習商賈

西域記尼波羅國山川連屬宜穀稼多花果地里志畧廓爾喀田土肥沃植產尚饒其人游牧耕種各守其業二麥黍稷棉花丹參肉蔻等物頗足給用衛藏圖識外番商賈有纏頭回民販賣珠寶白布回民賣璫璵藏錦卡契段布皆販自布魯克巴勒布天竺等處白布回民卽古泥婆羅人矣

一幅布蔽身日數盥浴

衛藏圖識由後藏塞爾地方行十餘日交白木戎界所屬種類繁多一種名納昂男女俱不著衣襯下以白布纏之一種名仍撒男著短衣齊膝婦女下體亦

以布遮重著視不著上衣惟白木戎男女皆披藏紬
偏單徐繼畲曰白木戎即白布仍即廓爾喀也

重博戲通推步歷術

舊書曰俗重博戲好吹蠡擊鼓

隋書經籍志所載婆羅門天文歷法凡五十九種唐
書麻志九執歷者出於西域開元六年詔太史監瞿
曇悉達譯之泥婆羅本中印度屬國故習梵天步歷
之術矣

祀天神鑄石為象日浴之烹羊以祭

舊書曰祀五天神

此西域胡祆即婆羅門舊教也杜佑通典職官門視
流內有薩寶符祆正自注祆者西域天神佛經所謂

摩醯首羅也元奘記尼波羅國邪正兼信伽藍天祠
接堵連隅僧徒二千餘人外道異學其數不詳案西
域故皆婆羅門祆教漢霍去病踰焉支收休屠祭天
金人疑即胡祆像非佛像也佛在天竺擯婆羅門諸
教為九十六種外道然奘法師所歷百數十國雖崇
三寶於建天祠有自在天婆藪天那羅延天禰那
天諸像或鑄以黃金飾以奇寶多者數百所少亦十
餘西戎舊俗殆非薄伽梵所能革焉泊夫紅黃喇麻
起自烏斯藏西域諸部靡然從風乾隆間廓酋旺傑
多尔濟至遣次子為刺麻住薩迦廟學經 國家因

其俗卽以達賴班禪羈縻之見姚瑩識小錄而胡祆之祀衰矣

鑄銅爲錢面文人形背牛馬形

舊書曰面文爲人背文爲馬牛不穿孔

漢書載罽賓烏弋山離諸國皆以金銀爲錢文爲騎馬幕爲人面或文爲人頭幕爲騎馬茲泥婆羅用銅錢蓋本其土所出也今則改鑄銀錢以與西藏貿易

高宗純皇帝惡其貪得無厭乾隆五十六年諭曰我國家中外一統同軌同文官鑄制錢通行無滯區區藏地何必轉用外番幣貨況伊將所鑄之錢易回銀兩又復攬銅鑄錢向藏內交易源源換給是

衛藏銀兩轉被廓爾喀逐漸易換莫若於西藏地方照內地之例安設鑪座在彼鼓鑄駐防大臣督同員役監製經理自可不虞缺乏五十七年諭曰藏內行使錢文設鑪改鑄寶藏字樣所有巴勒布銀錢不許再行使用卓哉

聖謨其於互市以來爲墨西哥銀錢侵耗國帑以大萬計者殆已明若觀火矣

其君服珠頗黎車渠珊瑚虎魄垂纓

一切經音義頗黎此云水精又云水玉或云白珠大智度論中此寶出山石窟中一云過千年冰化爲之此言無據西方暑熱土地無冰多饒此寶何物化焉

此但石類處處皆有也元中記車渠出天竺國賢按凡茲之類釋其尤異者義主證識地形種族沿革無取蟲魚之璪璪者焉

耳金鉤玉鐺佩寶伏突御師子大牀燎香布花于堂而大臣坐地不藉左右持兵數百列侍

釋名穿耳施珠曰瑠此本出於蠻夷蠻夷婦女輕浮好走以此瑠錘之也智度論佛爲人中獅子凡所坐若牀若地皆名獅子牀地持論眾生以種種香花供養如來此國王以浮圖之法自莊嚴也

宮中有七層樓覆銅瓦楹極皆大珙雜寶

元奘記曰西域重堂殿檐皆以七寶飾之

四隅置銅槽下有金龍口激水仰注槽中

殷夔刻漏法爲器三重圓皆經尺差立於方輿跼蹠之上漏水皆於器下爲金龍口吐水轉注入跼蹠經緯之中流于衡渠之下

初王那陵提婆之父爲其叔所殺提婆出奔吐蕃納之遂臣吐蕃

西域記尼波羅國王刹帝利栗咕婆種也近代有王號鴛輸伐摩唐言光胄

貞觀中遣使者李義表到天竺道其國

事在貞觀十七年見天竺傳蓋先由吐蕃以至泥婆羅也
今自西藏日喀則城南順阿隆河西南行由埃佛
勒斯峯之東逾嶺經廓爾喀境南至孟加拉爲藏印
往來常徑藏地故屬吐蕃貞觀方與弄讚和親國使
假道而往居然可知矣元奘則由于闐西行逾蔥嶺
入北印度不經吐蕃故自弗栗恃西北千四五百里
踰山入谷以至尼波羅復還吠舍釐國南渡殞伽河
以至摩揭陀也

提婆大喜延使者同觀阿耨婆瀾池池廣數十丈水常
溢沸共傳旱潦未始耗溢或抵以物則生煙釜其上少

選可熟

法苑珠林卷十六引王元策西國行傳云顯慶二年
敕使王元策等往西國送佛袈裟至泥婆羅國西南
至頗羅度來村東坎下有水火池若將家火照之其
水上卽有火焰于水中出欲滅以水沃之其焰轉熾
漢使等曾于中架一釜煮飯得熟使問彼國王答云
曾經以杖刺著一金匱令人挽出一挽一深相傳此
是彌勒佛當來成道天冠金火龍防守之此池火乃
是火龍火也

二十一年遣使入獻波稜酢菜渾提蔥

唐會要泥婆羅國獻波棱菜類紅藍花實似蒺藜火熟之能益食味又酢菜狀如菜濶而長味如美鮮苦菜狀如苣其葉濶味雖少苦久食益人胡芹狀如芹渾提蔥其狀如蔥而白辛嗅藥狀如蘭凌冬而青收乾作末味如桂椒其根愈氣疾

永徽中其王尸利那連陀又遣使入貢

通典在永徽二年

天竺

天竺漢身毒國也

山海經身毒之國軒轅氏居之郭注天竺國也史記大宛傳大夏東南有身毒國索隱曰身音乾毒音篤孟康曰卽天竺也漢書西域傳作天篤後漢書杜篤傳作天督釋元應一切經音義曰天竺或言身毒或言賢豆皆訛也正言印度印度名月月有千名斯一稱也良以彼土賢聖相繼開悟群生照臨如月因以名也一說賢豆本名因陀羅婆他那此云佳處謂天帝也按天字古叶鐵因反昔傳身毒今稱印度亦云

興都又作痕都皆一音之轉

或曰摩伽陀

摩伽陀一作摩竭提中天竺屬國釋慧苑華嚴經音義曰摩大也竭提體也謂五印度中此國最大統攝諸國故名大體也觀尸羅逸多上書稱摩伽陀王足知彼俗所宗仰矣

曰婆羅門

釋元奘大唐西域記曰印度種姓族類羣分而婆羅門特爲清貴從其雅稱傳以成俗無云經界之別總謂婆羅門國焉按 國朝魏源海國圖志西域佛未

出世以前皆婆羅門教以事天治人爲本卽彼方之儒者自佛教興而婆羅門教衰佛教衰而婆羅門教復盛一盛爲耶蘇之天主教再盛爲謨罕默德之天方教皆婆羅門之支變云云是則因茲教俗區彼品流今印度人率分四等以婆羅門爲上品猶唐以來故風矣

去京師九千六百里都護治所二千八百里

國朝姚瑩康輶記行曰唐史言天竺去京師九千六百里指長安而言也今陝西西安府至成都二千一百餘里成都至後藏七千四百餘里合之正九千六

百餘里然則天竺者其今後藏外之阿里以西地乎
按姚氏釋天竺道里乃并成都後藏計之迂矣今印
度中省亞加拉城卽痕都斯丹在 京師偏西三十
九度七分七千二十里以陝西西安府在偏西七度
三十二分一千二百四十五里診之其至中天竺當
五千七百餘里卽最遠之西省谷治地亦僅得八千
里今昔量寓容有滄桑經緯之度稿乎不易疑史失
之夸也唐安西都護府治龜茲今新置庫車城去印
度中省二千里

居蔥嶺南

舊唐書曰在蔥嶺西北按當以南爲是漢書西域傳
注師古曰西河舊事蔥嶺其山高大上悉生蔥故以
名焉 國朝徐松西域水道記僧格喀巴布山爲西
域諸山之宗當和闐正南過和闐西北發爲齊齊克
里克嶺喀什塔什嶺又西爲和什庫珠克嶺又北折
而東爲喀卜喀山又北而東爲喀克善山自齊齊克
里克至喀克善環千八百餘里包西域以周其北總
曰蔥嶺

幅員三萬里

後漢書從月氏高附以西南至西海東至磬起皆身

毒之地梁書中天竺地方三萬里西域記五印度之境周九萬餘里程大昌考古編曰元奘以貞觀三年往至十九年回其間以年計自當得五千餘日而已三分其日之一以爲屆止詢訪之日則其在行者不過十年不知十年之力何以能周徧九萬里而經涉他國地里又未在數此可見其妄甚明也魏氏源曰唐書三萬里者圍員之數圍三徑一計之裁萬里耳乾隆中開闢新疆三萬餘里然天山南北路縱橫皆不過六千里則所謂二萬里者亦圍員之數非徑一之數明史歷志謂天方回國在烏斯藏西八千餘里

其地爲西印度極邊海濱約計六七千里而南海中三千里爲僧伽刺島亦佛說楞伽經之地屬南印度此南北徑萬里之明証也姚氏瑩曰魏說得之而以西藏緬甸爲東印度則未必然唐書波斯居達遏水西距京師萬五千里而羸五天竺旣云西抵波斯又距京師九千六百里則是東西約六千里西藏波斯皆非天竺也元奘所云周九萬里當亦以開方計之但開方法方千里者爲方一里者百萬五印度地以方五千里計當二千五百萬方里元奘所云周九萬里者猶多未盡云云惟賢按釋道世法苑珠林卷二

十九錄元奘西域行傳云周萬九千里道世親聞奘師奉敕撰行傳十二卷撮其大旨爲聖迹篇必信而有徵今地圖五印度三角形每邊約六千里以三稜物九周包一計之得二萬一千里法苑所述是爲近之然則世傳域記出自辨機譯寫歧誤非元奘之失也

分東西南北中五天竺皆城邑數目

西域記百三十六國其八十國注五印度境自昔未嘗統一西史所載周末嘗屬西里亞漢時屬拔德克里卽安息大月氏也元秘史太祖命巴剌追回回王

過申河直至欣都思種地面元史憲宗二年命諸王

托羅該薩奇勒征身毒三年又命多托兒台薩里托

爾呼等征痕都斯坦監本作欣都思克實密爾監本作怯失迷兒等

國劉郁西使記所謂王師入西域降者幾三十國也

惜夫鞭撻所及徒侈藩屏之名罔收指臂之效迨明

嘉靖間元駙馬帖木耳之裔莫臥爾國王兼并印度

東取孟加拉建都于中印度之德希城威震西徼而

荷蘭英吉利法郎機諸國始緣貿易寢生覬覦夥涉

沈沈方滋內難屬部棄閒閉竟自擅無復綱紀國

朝乾隆二十年孟加拉長與法郎機約禁禍英人斃

其大半英人以舟師入安治土河東印度望風降附
樂勝席卷中南諸部嘉慶中復盡毆法荷二國駐印
度之兵而據其地於是忻都故虛爲英外府徐繼畲
瀛環志畧載米利堅人所刊地圖五印度舊國凡二
十有一若信地塞哥克什米爾猶土君之國今則鯨
吞蠶食偃焉靡遺此土迤北毗連西藏履霜之占所
致意焉

南天竺濱海出師子豹狸橐屯犀象火齊琅玕石蜜黑
鹽

國朝陳倫炯海國聞見錄曰小白頭南入于海之地

曰戈什峽東西南三面皆臨大海按此卽印度海與
大西洋太平洋稱寓內三大海也演繁露張衡七辨
曰沙飴石蜜遠國貢儲卽今沙糖也唐元奘西域記
以西域石蜜來詢知其法用蔗汁蒸造太宗令人製
之味色皆踰其初卽中國有沙糖之始耶續漢書天
竺國有黑鹽黃鹽和帝時數遣人貢獻後西域反叛
乃絕

北天竺距雪山圍抱如壁南有谷通爲國門

西域記迦濕彌羅國四境負山山極峭峻雖有門徑
而復隘狹自古鄰敵無能攻伐長春真人西游記過

大雪山積雪甚高馬上舉鞭測之猶未及其半又曰由佗路回遂歷大山山有石門望如削蠟有巨石橫其上若橋焉外國史略印度北連雪山稱曰希馬拉雅山與西藏交界希馬拉雅山高于海面二萬九千尺地球上第一高峯

東天竺際海與扶南林邑接

東印度孟加拉海也印度大洋隨地異名自錫蘭島迤東爲孟加拉海迤西爲阿刺伯海扶南三國吳始通今暹羅國林邑秦象郡屬縣漢爲象林縣漢末邑人區連殺縣令稱林邑王唐以後號占城一稱占臘

今越南平順城是

西天竺與罽賓波斯接

罽賓波斯自有傳

中天竺在四天竺之會都城曰荼縛和羅城

西域記羯若鞠闍國周四千餘里國大都城西臨疏伽河法苑珠林引記此文曰卽統五印度之都王也記又曰羯若鞠闍國舊王城號拘蘇磨補羅城後更名曲女城黃君懋材西徼水道篇曰恒水又東南流經康普爾古曲女城也康普爾屬印度西北省在赤道北二十六度二十八分京師偏西三十六度七分矣

濱迦毗黎河

今安治士河也佛經言恒河皆指此魏源恒河考曰恒河同源而異委其出於蔥嶺大龍池者即恒河之正源至印度而分二一由西印度入海是為西恒河一由東印度入海是為東恒河後世方俗傳稱東印度之河為恒河而譌稱西恒河為印度河至阿耨達注西海之水以印度河當之尤元奘記之謬夫東恒西恒同注南海非地中海烏得以印度河之海口為西海又安得分一恒河之水以當二河哉西徼水道篇曰印度凡三大水西曰印度河東曰蒲蘭蒲達江

而恒河橫貫其中番名安治士河中土之人稱印度河為西恒河安治士為東恒河實則恒者安之譯音也印度河譯作新頭河一作信地河初無恒河之名也水經注及康泰扶南傳于二水源流往往混亂蓋得之請經求法之僧轉展繙譯莫道其祥魏源誤以安治士與印度河同出一源至中印度以下乃分為二流不知印度河有五大源皆西南流匯而入海安治士河北源三一曰安治士二曰延那三曰菟伽南源二一曰幹普二曰申河皆東南流匯而入海中隔千餘里之砂磧尙有數小水自北而南至砂磧而伏流兩無所歸且砂磧地高

水易滲洩安治土河之水何緣飛越而過與印度河
同源乎賢按外國史畧稱印度河自西藏涌出初西
北流後轉西南入五印度地有五支河入之在新締
地有海口恒額河所流出之地在印度北界其地高
于海面九百丈南流入印度國又多分支入旁甲拉
海隅大西洋公紀安治土河發源謙麻那壓山新地
河發源西藏歷數千里至達岱入海謙麻那壓卽希
模拉雅二水原委灼然殊矣之二說者魏氏采入海
國圖志而泥法顯犁耛之文轉斥元奘西海之誤夫
談印度者莫如釋典長阿含經曰阿耨達池東有恒

伽河

元奘記作疏伽

從牛口出從五百河入於東海

元奘記作東南

海

池南有新頭河

元奘記作信度

從師子口出從五百河入

于南海

元奘記作西南海

新婆沙論疏伽河從池東面金象

口出右遶池一而流入東海信度河從池南面銀牛

口出右遶池一而流入南海診之西史觀若畫一未

可持肫見以鑿空也又按舊唐書茶鑄和羅城北臨

禪連河此卽元奘記之尼連禪河今爲申河矣

有別城數百皆置長別國數十置王

後漢書身毒有別城數百城置長別國數十國置王

雖各小異而俱以身毒爲名七十一西域聞見錄温

都斯坦都城雄壯周圍六十餘里轄大小回城三百

七十餘元奘記中印度諸國曰波理夜咄羅曰秣菟

羅原注亦謂三波訶曰薩他泥濕伐羅曰宰祿勒那曰秣底

補羅曰瞿毗霜那曰聖醯掣咄羅曰毗羅刪拏曰劫

比他原注舊謂僧伽舍曰羯若鞠闍曰阿踰陀曰阿耶穆佉

曰鉢羅耶迦曰憍賞彌原注舊謂拘跋彌曰鞞索迦曰室羅

伐悉底原注舊謂舍衛曰劫比羅伐罕堵原注舊謂迦毗羅衛曰藍摩

曰拘尸那揭羅曰婆羅痾斯原注舊謂波羅奈曰戰主曰吠

舍釐原注舊曰毗舍離曰尼波羅曰摩揭陀原注舊曰摩伽陀又曰摩竭提

曰伊爛拏鉢伐多曰瞻波曰羯朱嗚祇羅原注彼俗言羯蠅羯

羅曰奔那伐渾那曰憍薩羅曰摩醯濕伐羅補羅凡

三十國

曰舍衛

十二遊經曰舍衛國者晉言無物不有釋法顯佛國

記拘薩羅國舍衛城卽波斯匿王所治城也城內人

民希曠有二百餘家城南門外千二百步卽祇洹精

舍佛住此最久經行坐處亦盡起塔西域記室羅伐

悉底國原注舊曰舍衛國訛也周六千餘里如來在世之時鉢

羅犀那恃多王原注唐言勝軍舊曰波斯匿訛也所治國都也一切

義舍衛國或云舍婆提城或言捨羅婆悉帝夜城並訛也正言室羅伐國此譯云聞者城法鏡經云聞物

國又言黃懋材曰宛伽河南流入烏德國境又東南
橋薩羅至烏得城古舍衛國也西南五十里有非薩巴城元
奘記作室羅伐悉底云鄒代鈞西征紀程譯英人恭
甯翰印度圖斷爲西北部巴來支之東六七十里按
西域記室羅伐悉底卽舍衛國而黃氏一以爲烏得
城一以爲非薩巴城非也地理備考烏德國通商衝
繁之區一名非薩巴爾一名巴來支按圖烏得城在
巴來支東黃氏前說正與鄒合

曰迦沒路

西域記渡大河至迦摩縷波國東印度境國周萬餘

里土地泉濕稼穡時播般擻娑果那羅雜羅果其樹
雖多彌復珍貴河流湖波交帶城邑又曰此國東三
阜連接無大國都境接西南夷故其人類蠻獠矣詳
問土俗可兩月行入蜀西南之境然山川險阻瘴氣
氛疹毒蛇毒草爲害滋甚國之東南野象羣暴故此
國中象軍特甚按迦摩縷波急讀之則可譯寫爲迦
沒路也此土旣接西南夷又阻瘴氣多象似卽今孟
加拉地東亞拉干地矣外國史畧曰亞拉干地廣袤
方圓千八百里東連緬甸以高山爲界內多廣谷支
溪遇雨漲溢遍地成湖澤土極膏腴宜果木而多瘴

異方人不服水土海口處處可泊其魚繁林內多象
虎

開戶皆東嚮

舊書曰伽沒路國其俗開東門以向日西域記曰黎
庶之居內侈外儉門闢東戶朝座東面

曰迦尸或曰波羅柰亦曰波羅那斯

佛國記順恒水西行二十山延到迦尸國波羅捺城
城東北十里有鹿野苑精舍是佛成道處新婆娑論
曰問何故名婆羅痾斯答此是河名去其不遠造立
王城是故此城亦名婆羅痾斯西域記婆羅痾斯一

經音義婆羅痾斯
譯云江遶城也國周四千餘里都城西臨疏伽河

長十八九里廣五六里閭閻櫛比居人殷盛氣序和
穀稼盛果木扶疏茂草薈靡大城東北婆羅痾河婆
羅痾河東北行十餘里至鹿野有精舍黃懋材曰恒
水東流至馬思普爾折東北至丕那勒士古波羅柰
城也又東北流與幹得河相會按幹得河一名高翁
的河卽古婆羅痾斯河矣丕那勒士英圖謂之班拏
勒斯一曰比那勒外國史畧比那勒城亦五印度之
聖城四方雲集以拜佛像每年自遠方來不下十萬
爭向恒額河浴身

唐書西域傳注 三
其畜有稍割牛黑色角細長四尺許十日一割不然困且死人飲其血或曰壽五百歲牛壽如之

此本釋法盛歷國傳也見文獻通考四裔考注又張華博物志越雋國有牛稍削取肉牛不死經日肉生如故元中記大月氏及西胡有牛名爲日及今日取其肉三四片明日其肉已復創亦愈猶此類矣

中天竺王姓乞利啞氏亦曰利利世有其國不篡殺

西域記族姓殊者有四流焉一曰婆羅門淨行也二

曰利帝利王種也原注舊曰利利訛也一切經音義利帝利此云土田王也三曰

吠耆商賈也四曰戍陀羅農人也又云羯若鞠闍國

王本吠耆種也

土溽暑稻歲四熟禾之長者沒橐駝

孔帖烏菴國四熟之稻苗高沒橐駝米大如小兒指以貝齒爲貨

說文貝海甲蟲也古者貨貝而寶龜至周而有泉到

秦而廢貝行泉本草貝子一名貝齒出東海西域記

恭御陀國多有奇寶螺貝珠璣斯爲貨用

有金剛旃檀鬱金與大秦扶南交趾相貿易

抱朴子扶南出金剛生水底石上如鍾乳狀體似紫石英可以刻玉雖鐵錐擊之亦不能傷唯羚羊角扣

唐書西域傳注 三
之則灌然冰泮西使記金剛鑽出印毒以肉投大澗
底飛鳥食其肉糞中得之本草集解檀善木也故字
從直釋氏呼爲旃檀以爲湯沐猶言離垢也楊孚南
州異物志鬱金出罽賓國人種之先以供佛數日萎
然後取之色正黃與芙蓉花裏嫩蓮者相似可以香
酒交趾今越南國

人富樂無簿籍耕王地者乃輸稅

西域記戶不籍書人無徭課各安世業俱佃口分假
種王田六稅其一
以舐足摩踵爲致禮

西域記致敬之式極惟一拜跪而讚德謂之盡敬遠
則稽顙拜手近則舐足摩踵

家有奇樂倡伎

杜佑通典天竺樂樂工阜絲布樸頭巾白練襦紫綾
袴緋帔舞二人辮髮朝霞袈裟若今之僧衣也行纏
碧麻鞋樂用羯鼓毛員鼓都曇鼓篳篥橫笛鳳首箏
篥琵琶五弦琵琶銅鈸貝其都曇鼓今亾

王大臣皆服錦罽爲螺髻於頂餘髮剪使卷男子穿耳
垂瑠或懸金耳綏者爲上類徒跣衣重白婦人頂飾金
銀珠纓絡

法苑珠林引立世阿毗曇論曰閻浮提人或有頂留一髻餘髮皆除名周羅髮西域記衣裳服玩無所裁製重鮮白輕雜彩男則繞腰絡腋橫巾右袒女乃襜衣下垂通肩總覆頂爲小髻餘髮垂下或有剪髻別爲詭俗首冠花鬢身佩瓔珞南史狼牙修國女子以纓珞繞身其所服者謂僑奢耶衣及氎布等僑奢耶者野蠶絲也又曰國王大臣服玩良異花鬢寶冠以爲首飾環釧瓔珞而作身佩其有富商大賈惟釧而已人多徒跣少有所履

死者燔骸取灰建窆堵或委野中及河餌鳥獸魚鼈無

喪紀

立世論曰閻浮提人若眷屬死送喪山中燒屍棄去或置水中或埋土裏或著空地西域記終沒臨喪哀號相泣裂裳拔髮拍額椎胸服制無聞喪期無數送終殯葬其儀有三一曰火葬積薪焚燎二曰水葬沈流漂散三曰野葬弃林飼獸一切經音義偷婆經中或作兜婆或云塔婆或言藪斗波皆訛也正言窆堵波此云廟或言方墳皆義釋也

謀反者幽殺之小罪贖錢不孝者斷手足劓耳鼻徙于邊

法苑珠林引王元策西國行傳曰摩伽陀國法犯罪者以神稱稱之據此輕重以善惡科罪剜眼截腕斷指別足視犯輕重以行其刑若小罪負債之流並鎖其兩脚用爲罰罪西域記凶悖羣小時虧國憲謀危君上事迹彰明則常幽囹圄無所刑戮任其生死不齒人倫犯傷禮義悖逆忠孝則劓鼻截耳斷手別足或驅出國或放荒褻自餘咎犯輸財贖罪

有文字善步歷法悉曇章妄曰梵天法書貝多葉以記事

隋書經籍志有婆羅門天文經婆羅門算法一切經

音義西域悉曇章本是婆羅賀磨天所作自古迄今更無異書但點畫之間微有不同耳悉曇此云成就論中悉檀者亦悉曇也以隨別義轉音名爲悉檀婆羅賀磨天者此言淨天舊言梵天訛畧也西域記詳其文字梵天所製原始垂則四十七言遇物合成隨事轉用段成式酉陽雜俎貝多出摩伽陀國長六七丈經冬不凋此樹有三種並書其葉部闍一色取其皮書之貝多是梵語漢翻爲葉西域經書用此三種皮葉若能任護亦得五六百年

尚浮屠法不殺生飲酒

後漢書天竺修浮圖道不殺伐遂以成俗袁宏後漢紀浮屠者佛也佛者漢言覺將悟羣生也魏書釋老志浮屠正號曰佛陀佛陀與浮圖聲相近皆西方言其來轉爲二音華言譯之則謂淨覺有五戒去殺盜媾妄言飲酒大意與仁義禮智信同名爲異耳國中處處指曰佛古迹也

若鹿苑鷲峯菩提樹祇陀林之類

信盟誓傳禁呪能致龍起雲雨

今有大雲輪請雨經及大方等大雲經並載乞雨陀羅尼呪十六國春秋前秦錄涉公者西域人以堅建

元十一年至長安有秘呪能下神龍時天大旱堅命呪龍請雨龍便下鉢中其雨霈然法苑珠林陀羅尼者西天梵音東華人譯云持也依法施行功用立驗或碎石拔木或移痛滅痾或召集神鬼或駕御虬龍感應不窮其來久矣

隋煬帝時遣裴矩通西域諸國獨天竺拂菻不至爲恨隋書裴矩傳帝令矩往張掖引致西蕃至者十餘國大業三年帝有事于恒岳咸來助祭帝將巡河右復令矩往敦煌矩遣使說高昌王麴伯雅及伊吾吐屯說等陷以重利導使入朝及帝西巡次燕支山高昌

王伊吾設等及西蕃胡二十七國謁于道左

武德中國大亂王尸羅逸多勒兵戰無前象不弛鞍士不釋甲因討四天竺皆北面臣之

後漢書天竺國乘象而戰艾儒畧職方外紀曰印度有五惟南印度尚仍其舊餘四印度爲莫卧爾回國所併莫卧爾國象至三千餘隻吞併鄰國甚多嘗攻西印度西印度王統兵五十萬馬十五萬象二百每象負一木臺可容二十人又載銃千門金銀五十巨罌以禦之不勝盡爲莫卧爾國王所獲云云戎俗便象猶東海傳使鹿使犬之族矣尸羅逸多西域記作



